

09 DEC 2002

DR MAHATHIR HADIRI MAJLIS RAYA PUTERI UMNO

KUALA LUMPUR, 9 Dis (Bernama) -- Perdana Menteri Datuk Seri Dr Mahathir Mohamad hari ini menghadiri majlis rumah terbuka Hari Raya Aidilfitri Pergerakan Puteri Umno di Pusat Dagangan Dunia Putra (PWTC) di sini.

Lebih 5000 orang termasuk anggota Puteri Umno dari seluruh negara menghadiri majlis itu yang berlangsung di Dewan Merdeka, PWTC.

Turut hadir Timbalan Perdana Menteri Datuk Seri Abdullah Ahmad Badawi dan isteri Datuk Seri Endon Mahmood serta beberapa orang menteri kabinet.

Ketibaan Dr Mahathir dan isteri Datin Seri Dr Siti Hasmah Mohd Ali disambut oleh Ketua Pergerakan Puteri Umno Azalina Othman Said dan para anggota exconya.

Pada majlis itu Dr Mahathir, Dr Siti Hasmah, Abdullah dan Endon turut memotong kek Hari Raya. Majlis diserikan dengan persembahan nyanyian oleh Siti Nurhaliza dan seniman veteran Tan Sri S.M.Salim.

Dr Mahathir juga menyerahkan sumbangan Hari Raya Puteri Umno kepada wakil-wakil Angkatan Tentera Malaysia dan polis.

Perdana Menteri turut menyampaikan Anugerah Puteri Remaja kepada Siti Nurhaliza di atas sumbangan dan pengorbanannya kepada masyarakat dalam bidang kesenian.

-- BERNAMA

NBB RV MOZ